

«Omar a Haiti»

Nov film da la Televisiun Rumantscha

■ **(anr/fa) Il magister primar Omar Gosatti da Puntraschigna fa ses servetsch civil a Haiti en la Caribica. El dat là seminaris per magisters. Martin Valär da la TvR l'ha fatg ina visita.** Er sche la Televisiun Rumantscha è en sasez in emettur regional banduna ella adina puspè las muntognas grischunas e rapporta da Rumantschs a l'ester. Il film «Sigisbert en Africa» per exempel quinta dals paders grischuns Clemens Giger e *Baseli Fetz* ch'eran ids avant blers onns a lavurar en Tansania. Il film «Sahârig – la tur d'aua» mussa la lavur da l'artist *Marc Bundi* en il Sudan e «Colani en Canada» quella da la guida da muntogna *Jon Rudolf Bezzola* en l'America dal nord. Il pli nov film da la TvR quinta da la lavurad *Omar Gosatti* da Puntraschigna, il qual presta ses servetsch civil en la Republica da Haiti, sin l'insla Hispaniola en la Caribica. L'anr ha vuli savair da *Martin Valär*, l'autur ed um da camera dal film, co ch'igl è vegnì a quest film.

Gi immediatamain interess

«Mes nev Rico m'aveva ditg la stad passada ch'el giaja en vacanze a Haiti, a far visita ad Omar», quinta il collavuratur da la TvR, «che quel prestia là ses servetsch civil.» *Martin Valär* ha vuli savair tge ch'el fetschia là, *Omar Gosatti* lavura uschiglio sco magister primar a Samedan. En ses ser-

vetsch civil ha el l'incumbensa da la Confederaziun svizra e da l'organisasiun d'agid Eirene Schweiz d'organisar e dar seminaris ed instruir magisters haitians. Quai ha interessà l'um da televisiun: «Quels pajais èn fitg engraziavel per filmar, causa la ritgezza da bels maletgs e purtrets ch'i dat là.» El ha preschentà l'idea als responsabels da la TvR e quels l'han dà la permissiun da realisar il project.

Ina bell'invista en la vita haitiana

En ses film «Omar a Haiti» po visitar l'aspectaturA ensemen cun il giuven magister putèr diversas scolas da l'insla caribica. Il sistem da scola da Haiti è cumparegliabel cun quel che nus avevan avant passa tschient onns. Als uffants indigens nun importa però, sche lur scola è antiquada u betg: Els han plaschair da mussar tge ch'els san e quant bain che tunan lur chanzuns. Ins vesa co che Omar lavura cun ils magisters indigens e cun quanta motivaziun che quels èn pronti d'emprender. En il film fan ins er ina visita a Port au Prince, la chapitala da Haiti. Per far il film ha gi da renunziar *Martin Valär* a blers meds technics che stattan uschiglio a disposiziun ad in cineast.

Cun custs minimis

«I fiss stà impussibel da vulair ir a Haiti cun in'equipa entira, ins

n'avev betg survegnì las permissiuns necessarias.» Perquai ha'l prendì cun sai mo ina pitschna camera, la quala aveva plaz en la bulscha. Sco um dal tun l'ha accumpagnà *Thomas Bruderer*. «A l'entschatta avevi num, qua na pudais filmar e là er betg, ma a la fin finala, sunter avair discurrì cun els èn tuts stads pronti da sa laschar filmar.» L'avantag da la pitschna equipa era ch'il film ha custà mo pauc, «jau less dir probablmain pli pauc ch'ina emissiun da Cuntrasts che nus faschain a Cuira». Il film che dura 24 minutas preschenta il project da Omar, mussa co ch'el viva e tge ch'el fa. Set dis a la lunga ha filmà *Martin Valär* da la damaun fin la saira. Da la tecnica, sco ch'el di «mo semiprofessionala», na badan ins però nagut: Ad el ési gartegià da reproducir en ses film l'atmosfera che regna a Haiti. «Cur che jau turn enavos en Svizra vi jau prender cun mai la cuntantezza da la glieud da qua, lur avertezza envers ils auters e l'atmosfera tutt speziala che regna tranter els», di Omar Gosatti a la fin dal film.

Datas d'emissiun: dumengia, ils 25-05-2003, 17.00 sin SF 1 (Cuntrasts)

mesemna, ils 28-05-2003, 23.05 sin TSR 2

sonda, ils 31-05-2003, 11.40 sin SF 1

dumengia, ils 1-05-2003, 7.45 sin TSI 1



Martin Valär, l'autur e l'um da camera dal nov film da la TvR.